

SKMM sekat portal Sarawak Report
Astro Awani
Julai 19, 2015

KUALA LUMPUR: Suruhanjaya Komunikasi dan Multimedia Malaysia (SKMM) hari ini mengambil keputusan menyekat laman web 'Sarawak Report'.

SKMM dalam kenyataan terbaharu di akaun Facebook rasminya berkata laman web berkenaan didapati memaparkan kandungan yang masih belum dipastikan kesahihan dan sedang dalam siasatan.

Kenyataan itu menyebut bahawa tindakan menyekat laman web berkenaan dilakukan SKMM mengikut peruntukan undang-undang selepas menerima maklumat dan aduan daripada orang ramai.

"Sekatan terhadap laman sesawang The Sarawak Report itu juga dibuat mengikut peruntukan sedia ada dalam Seksyen 211 dan Seksyen 233 Akta Komunikasi dan Multimedia 1998 dan tempoh sekatan terhadap laman sesawang berkenaan berkuatkuasa untuk sementara waktu sehingga tamatnya siasatan yang dilakukan oleh Pasukan Petugas Khas," kata kenyataan itu.

SKMM dalam kenyataannya turut mengingatkan orang ramai supaya lebih berhati-hati ketika berkongsi maklumat di laman sosial terutamanya kandungan yang belum dipastikan kesahihannya.

Tambahnya, kandungan sedemikian dikhuatiri boleh mewujudkan keadaan tidak tenteram dan seterusnya mengganggu-gugat kestabilan negara, ketenteraman awam dan kestabilan ekonomi.

Copyright © Astro Awani Network Sdn. Bhd. 2014 (535275-D).

Source: <http://www.astroawani.com/berita-malaysia/skmm-sekat-portal-sarawak-report-66409>